



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : f Tir Yimiyim

ig tir_yimiyim

yt tir yimiyim

TAPAK 3

Ukraine dak amakba manenra,
Moscow-a arongtsü: Zelensky

Rahul Gandhi-i 'Chhatron Ki Goonj'
signature campaign tenzüksüogo



VOL. XXIII ISSUE NO. 246 (ADOK 246) DIMAPUR ROGONÜ (FRIDAY) AAMI (JUNE) 19, 2026

₹ 5.00

NSCN-IM Joint Council-i FA nung nokdaksü pangjemshi

Dimapur, Aami/June 18 (TYO): Hebron nung aliba lenirtemi 2015 Framework Agreement ketdangsuba nung temulung masüba aser telung nung tasa tamajung yanglua aser cadre tem tepsetba atema NSCN-IM indang Eastern Flank ajanga yimjak nung aitsür anogo ana lir, Brehostibarnü NSCN-IM Joint Council ajanga Framework Agreement (FA) nung nokdaksü pangjemshi aser tang aliba 'collective leadership' bhukuma Naga lima asoshi inyakba nung atsüanam makatsü mesüra bendanga magütsüsü ta sangdong.

Hebron nung Joint Council senden ka amenba sülen sangdong ka agütsüba nung, parnoki Naga national movement dak sendakba tongtipang ken o tem amena jembir pangzüng tem yanglu, ta ashi.

Yaruiwo Q Tuccu, Kedalo Tongmeth Wangnao, Ato

Kilonser Th Muivah aser Deputy Ato Kilonser Lt. Gen. (Retd.) VS Atem nunger collective leadership kübok NSCN/GPRN-i kodanga Naga national cause bendanga magütsü, magütsüsü mesüra yangji atsüamem makatsü ta Joint Council ajanga sangdong.

Pangzüng nung parnoki tang aliba collective leadership nem tashi agütsü aser pei sasa telemtetba agia yimsü asütsü asoshi Naga nübur indang movement aniba nung parnok dak tamang akaba lemsatapa liasü.

Parnokisa August 3, 2015 nung zülutepba FA kumzüka ayutsü pangjemshi, koba yimtenren tangatetep kati arutsü asoshi tamendak dak lir ta ashi.

NSCN-IM ajangasa Naga nunger, region nung ketdangsurte aser Naga nunger asoshi inyakba nung temeim sayurtem dang par lenirtem den nokdaksü ayongzüka liasü.

NMA-i Nagaland angh den tetsür anema inyakba tebilemstü lemsatap

Dimapur, Aami/June 18 (TYO): Tetsür anema mapa tamajung aika inyakba aser nisung tepsetba ken o tatem kati maruteti Nagaland nung nüburtem jashitepa aliba mapang ka nung Naga Mothers' Association (NMA) ajanga Nagaland Angh Nand Kishore Yadav dang tekeraba nung timtem ajurur alir nem ochi obendang agüja mapa tamajung inyaker nem tapet temerenshi agütsüsü asoshi mera agütsü ajungshia liasü.

Brehostibarnü sangdong ka nung ashiba agi, NMA lenirtemi June 17, 2026 nü Lok Bhavan, Kohima nung angh ajurua state nung tetsür anema mapa tamajung inyakba ken o balala indang tezüluba ka agüja liasü.

Iba mapang parnoki Dimapur nung tetsür chanu ka dak nisung asemi tim masüba mapa inyakba indang tebilemstü lemsatap aser, iba ken o ajanga tesem ajunga nung nüburtem mepelai kumdaksüogo, aungji kanga junga bushisingdang tetsürla nem ochi obendang agüja rehabilitation shidak agütsüsüla, ta ashi,



Nand Kishore Yadav

Parnoki ano IAS officer Reny Wilfred anema ken o benoka aliba indang lephsia, iba ken o nung obendang agütsüsü menuba ajanga ken o benoker tali timtemer aser aika ochi obendang bushiba mapang parnok contract nung mapa inyaka aliba samaogo ta ashi.

Ken o menudaksüba ajanga Noklak nung tetsür dak tashiyim mapa inyak ta tai tonglojka ken o benoka alisang ketdangsurte maneni mapa inyakba tesem nung tetsürtem merenshir aser Nagaland State Commission for Women züngsemtem anema ken o kar benoka lir, ta NMA-i ashi.

Pimla nung tanur tetsü ka tepsetba, Kohima nung college azünger Vihozonuo Sao tepsetba ken o tem tang tashi obendang magütsüteti aliba indang parnoki lemsatap aser forensic examinations agiala tang tashi obendang magütsüteter aser police temi bushisingdangba nung nüburtemi temulung melemteti kumogo, ta angh dang ashi.

NMA-i angh dang Manipur nung Kiki telungpuri Naga nunger civilian trok pua bener oa tepsetba nunga temulung agütsüsü aser iba ken o India tir dangi abentsü aser aibelener pua temerenshi agütsüdaksüsü mepishia liasü.

Tetsür temeden asoshi nokdaker NMA advisor ka aser tangar tetsürtem takum agütsü amokmerenba indanga parnoki lemsatap aser mapang tatsüka tsüngta tai tonglojka alir bail nung chiojka sülen ken o tejakleni aoba mali, ta ashi.

Angh-ia NMA ketdangsurtem dang item ken o reprangtsü langzür senden tembanga liasü.

Lokti balalai International Day of Yoga anema ola adoker

Nagaland nung Yoga Day Hombarnüi belener

Dimapur, Aami/June 18 (TYO): Deobarnü International Day of Yoga amungtsü aliba dak sendakba nung kaketshir tentet, arogo aser civil society telok balalai anema nokdaka sülen Nagaland sorkari kaketshir reju nung iba anogo ya June 21 nung masü June 22 nung amungtsü Brehostibarnü Nagaland sorkari telemtetba agiogo.

School Education department ajanga Directorate of School Education dang June 21, 2026,

Dimapur, Aami/June 18 (TYO): Principal Director, Directorate of School Education, Nagaland ajanga Government aser Private schools ajanga dang June 21, 2026 nü International Day of Yoga amungtsü totuyuba agütsüba anema Nagaland Baptist Pastors' Union (NBPU) ajanga tebilemstü akaba aser jashiba lemsatapa liasü.

Temang anema alitsü ya tongtipang ta angateter, ajüsüka Yoga ya temang atsüshia 'exercise' agiba kisüng masü saka puti otsü aser tesayuba tsüsü tamangba yimsü nung tera yanga lir, koba Khistanpur tesayuba aser yimya nung mapet lir, ta NBPU-i ashi.

Khristan yimsü nung tekumtet, tanüla ainba aser Tsüngrem den lungjemtsü ya Yisu Khrista dak amangba kisüng nungi arur ta sayur. Anungji Laishiba tesayuba aser Khristan yimya den mapetsüsa Yoga dak sendakba sentong mesüra inyaksangshi nung shilem agütsü tuyuba mesüra ajungshiba khenyongi magizüker, ta ashi.

Deobarnü iba anogomung amungtsü aliba thinentstü totuyuba agütsüba sülen iba telemtetba ya agia liasü.

Sorkari totuyuba agütsüba sülen Directorate of School Education ajanga district education officers aser sub-divisional education officers ajanga dangi totuyuba tasen ka agütsüba nung kaketshir reju dang 12 buba International Day of Yoga ya June 22 nü amungtsü metetdaksü.

Ajidang masü June 21, 2026 ya Deobarnü, Kibubar anogo, kong tamanger temi Tsüngrem o nung aliba ama külema, sentong agia aser sarasadema amunger. Taküm iba anogo ya Father's Day ajurur, koba Nagaland nung arogo aser kibong aikati kanga metsünga-reta amunger. Anungji iba temeshi anogo ya Tsüngrem külemba aser Khristan kibong tashi itshiba nung bendanga agütsüsü tim ta amanger, ta NBPU ajanga ashi.

Anungji, Nagaland nung aliba Baptist arogotem, pastors, arogo lenirtem, Khristanpur kaketshir reju, tsürabor, lanurtem aser tamanger ajanga dang International Day of Yoga mamungtsü mesüra iba dak sendakba sentongtem nung shilem magütsü ayongzüker, ta parnoki ashi.

NBPU-isa sorkar aser tim ketdangsurtem dang Constitution of India kübok tamangba yimsü temeden agüja aliba akhumtsüboa amshitsü aser memulunger tem iba sentong nung kangshia shilem

magidaksüsü ayongzüker, ta ashi.

Directorate of School Education, Government of Nagaland ajanga state tesem ajunga nung kaketshir reju dang June 21, 2026 nü 12 buba International Day of Yoga amungtsü totuyuba agütsüba asoshi kanga jashir aser memulunger, ta Naga Students' Federation (NSF) sangdong ka ajanga ashi.

Iba totuyuba, talisa Deobarnü amungtsü ya Naga nunger tamangba yimsü mezüngmeshi lir. Khristan yimsü nung Deobar anogo ya temeshi lir, aser iba ama temeshi anogo ka nung iba ama inyakyim amshidaksüsüba ya India indang Constitution indang Article 25 kübok tamangba yimsü temeden agüja aliba anema inyakba aser International Covenant on Civil and Political Rights (ICCPR) indang Article 18 aser Universal Declaration of Human Rights (UDHR) indang Article 18 nung shia aliba den khenyongi mapet lir, ta NSF-i ashi.

Iba ama tim masüba totuyuba agütsüba onoki khukhua aitsür aser DSE aser Nagaland sorkar dang tangsa iba sangdong agientsü ayongzüker.

"Official" totuyuba tenüng amer tashiyim amshia iba totuyuba sülen manidaksüsüla. Ibai onoki süoki ia reprangtsü aser iba ajanga timtem kar adokra, department khuret asütsü, ta Federation-i ashi.

Nüburtem tamangba yimsü den mapetba inyakyim nung shilem agidaksüsü kecha sorkar dak tashi mali. Tang education

sector nung timtem ajurua aliba bentetsü mesüra kaketshir aser lanurtem ajanzüksü aser tejangraba nung yaritsüsa sentong yanglua inyaksü meleni iba ama sentong nung administrative machinery aser nübur meyong rongsen indokba atema sasa bilemer, ta NSF-isa ashi.

Iba anogomung nung shilem agütsü atema tesayur, kaketshir mesüra kaketshir madak tashiyim amshiba, merenshiba mesüra yimya balala amshiba metetra takok magütsüsü.

NSF indang Federating Units aser subordinate bodies ajanga dang saksalema alitsü aser iba ama sentong kaketshir kecha nunga magidaksüsü asoshi tapet mera agütsü metetdaksür, ta parnokisa ashi.

DSE ajanga state nung kaketshir reju ajanga dang Deobarnü, June 21, 2026, International Yoga Day amungtsü aser kaketshir aser staff ajanga shilem agidaksüsü totuyuba agütsüba asoshi tebilemstü akar, ta Central Nagaland Tribes Council (CNTC) sangdong ka ajanga ashi.

Temang anema alitsü nükjidong nung mera balala agiba pela agizüker, saka Khristanpur timba aliba state ka nung temeshi anogo nung iba sentong amungtsü yangluba ya kanga shisa maka lir.

Ibai sentong ka agiba kisüng masü saka Nagaland nung nisung timba atema temeshi ta züngshiba anogo ka nung ayongzüka aser shilem agütsü ajungshiba yagi tebilemstü akar. Anungji iba sangdong ya tangsa agientsü Department dang

ajungshir, ta CNTC-i ashi.

Temeshi anogo ka nung iba sentong nung kaketshir aser tesayur tem shilem agütsü totuyuba agütsüba ya kangasa tim masü, koba ajanga tamangba yimsü yirutsür, ta Ongpangkong Kaketshir Mungdang (OKM) sangdong ka nung ashi.

Iba dak sendakba nung Ao Kaketshir Mungdang ajanga department dang iba sangdong agientsü tezüluba agüja aliba nung onok nokdaka lir, ta OKM ajanga ashi.

Iba mangatetep aketba totuyuba tangsa agientsü ketdangsur dang akhanger, aji mesüra nüburtemi administration dak tamang makateti akumtsü aser nüburtem jashia aser democratic yimya nung longkak aitsüsa akumtsü.

Ozü nübur tamangba yimsü temeden wazüka ayutsü asoshi onoki maneni nokdaksü, koba Constitution of India nung mela lir, ta OKM-isa ashi.

School tem dang yoga sentong ayongzüka Action Taken Reports (ATRs), geotagged photographs, attendance records aser iba anogomung dak sendakba kuli tem temaba ketdangsur nem agütsüsü totuyuba agütsüba asoshi tebilemstü akar ta NPYF Dimapur District ajanga sangdong ka nung ashi.

Kaketshirtem temang anema alitsü asoshi mera agiba pela agizüker, saka sentong ka nung shilem agütsü atema tamangba yimsü mesüra tangatetba ya tashiyim agi mazüoktsüla, ta ashi.

Nagaland Angh Nand Kishore Yadav-i NIMSR semdang



Dimapur, Aami/June 18 (TYO): Nagaland Angh Nand Kishore Yadav-i June 18 nü Nagaland Institute of Medical Sciences and Research (NIMSR), Kohima semdanga iba reju terenlok asadanga den faculty, staff, kaketshirtem aser stakeholder tem den sensaksema liasü.

Sentepa aliba lokti den o jembiba mapang Angh-i, NIMSR ya Nagaland puti otsü nung tongtibang alizüng ka tongtetba aser state nung mezüngbuba medical college lir, aser iba ajanga healthcare, medical education aser bushisüngdang akangshitsü atema arok tejangraba aliba sayur ta ashi.

Paisa, 2023 küm MBBS programme tenzüka sülen tang tashi nung takoktem ajanga temulung asüba lemsatap, aser iba riju tanem tanemi renloka aoba ngua pelaba lemsatapa liasü.

Anghi ashiba agi, NIMSR nung modern academic facility

tem amenoka lir, kong smart lecture theatre tem, central library ka, advanced skill & communication laboratory tem densema lir.

Pai, Family Adoption Programme, community health outreach inyakyimtem, mentor-mentee system amala inyakyimtem aser kaketshirtem lenla ajak nung terenlok atema iba riju rangloker aliba atema tenüngsang agütsü, aser ashiba agi, iba amala jenjang agiba ajanga tangar asoshi aria bilemba aser mapa tajet healthcare professional tem anitetsü atema teyari agütsür.

Maneni Angh-i, healthcare infrastructure akangshitsü asoshi jenjang agiba tenüngsanga jembiogo, kong NIMSR Hospital inyaksangshi tenzüksüba aser yipden 400 aketba tertiary care centre ka amenoktsü benoker aliba densema lir. Pai, iba amala terenlok ajanga shirangertem anepalutsü, medical tesayuba aser bushisüngdang tashi taitba

kümdaktsütsü ta ashi.

Yadav-isa, Indigenous Herbal Garden ka amenokba aser artificial intelligence aser digital technology tem ajanga innovation ajungkettsü merangba atema tenüngsang agütsü.

Yimtsüng ajak aser nüngdaka alir ajak nem healthcare service tajung agütsütsü atema NIMSR nükijidong yur aliba ya tenüng asangtsü langa lir aser iba ajanga aika ajungmesor, ta pai ashi.

Stakeholders ajak maneni bendanga agüja inyaksü ajungshiba den Angh-i, Nagaland nung healthcare tarutsüji NIMSR amala rijutem dak metaloker lir ta ashi. Iba riju ya medical education, bushisüngdang aser shirangertem anepaluba nung centre of excellence ka akümtsü ta temulung lema bilemer, ta pai ashi.

Anghi, NIMSR management, faculty, staff aser kaketshirtem maneni renlokyonga aotsü imlaja ataba lemsatap.

Entrepreneur Awareness & Special Vendor Development Programme takok ngua agiogo



Dimapur, Aami/June 18 (TYO): Brehostibarnü Entrepreneur Awareness & Special Vendor Development Programme sentong ka SBI Rangapahar Branch, Duncan, Dimapur anasa E-Space nung kanga takok ngua agiogo.

Iba sentong ya National Small Industries Corporation (NSIC), Ministry of MSME, Government of India kübok National SC-ST Hub (NSSH)-i ayongzüka agiogo.

Sentong nung Nagaland kübok tesem balala nungi entrepreneur, shishilembar aser stakeholder 100 shi-i shilem agia liasü. Sentong nungsa NSIC nungi ketdangsurtem den sorkar department balala, financial institutions, aser Central Public Sector Undertakings (CPSUs) nungi ketdangsurtemi shilem

agi. Sentong ya Business Association of Nagas (BAN) Vice President (National) Colo Mero-i lokti pela agizükba ojembir tenzü, shibai sorkar procurement aser business development inyakyimtem nung local entrepreneur tem nem tali shilem agidakja parnok ajungkettsü koda tongtibang iba indang lemsatap.

Sentong nungsa NSSH, GeM, Ministry of MSME, Industries Department, Nagaland sorkar, SBI, Food Corporation of India (FCI), Cement Corporation of India (CCI), Airports Authority of India (AAI), NIT/IOCL, ICAI, aser AICIL nungi lenirtemi presentation balala agütsü. Iba ajanga entrepreneur tem procurement maongka

bushiyonga aotsü aser parnok shishilembaba network tem atsülanga aotsü ajungmesogo.

Sentong nung tongtibang jenjang ka agibaji angati agi sentong agiba tesem nung GeM aser Udyam nung züngoksemtsüba ya liasü.

Maneni local oset aser service tem sayauba exhibition-a tila ka lapoktsüogo, aser iba ajanga sentong nung shilem agirtem kati ka den sendakteptsü aser parnok mapa balala ajungkettsü asoshi maongka agütsüogo.

Sentong ya shilem agirtem yongtsü nung sensak asema den Nagaland nung entrepreneurship aser MSME tem nongita yaritsü atema NSIC aser parnok partner tem bendanga agütsür aliba nenshia tepela o jembir tembanga liasü.

Social Audit training aser orientation sentong agiogo

Dimapur, Aami/June 18 (TYO): NSSAA Social Audit Unit Nagaland, District & Block level nung Social Audit Resource Persons atema VB-G RAM dak sendakba nung Social Audit training aser orientation sentong June 16 aser 17 nü SIRD Conference Hall, Kohima nung agiogo.

Iba sentong ya Ministry of Rural Development (MoRD) aser National Institute of Rural Development & Panchayati Raj (NIRDPR), Hyderabad nati ketdangsia agia liasü.

Iba sentong ya MGNREGA nungi VB G RAM-G-i melenba mapang Social Audit Resource Persons tem renema toktsütsü nükijidong nung agiogo. Orientation aser training

mapang VB G RAM - G Framework & Social Audit Methodology amala tongtibang onüktem ayimjema agiogo, koba VB-G RAM-G kübok inyakyim merek mereka inyaksü aser lokti ketdangsiüsü atema lir.

Ajak senteper iba sentong nung district balala nungi nisung 49-i shilem agi. Sentong nung shisalen sayurji Dr. Srinivas Sajja, Centre for Social Audit, NIRD PR, Hyderabad, DRD Nagaland nungi Leeom Watlong Yanlem, RDO; Menote-u Sarah, RDO; Munuho Lohe, RDO; NSSAA SAU Nagaland nungi Imlirenla Sanglir, Asst. Director; Sezolu Swuro, SRP aser Vezokholu Khusoh, DRP nung liasü.

Kohima police-i telungpur asem apu



Dimapur, Aami/June 18 (TYO): June 18 nü anepdang 10 ako shi nung telungpur asütsü ta temulung melemi bilemertem Dimapur nungi Kohima leni oya aliba osang tejangja ka angazükba sülen Kohima Police-i Special Operations Team (SOT) ka yoka item nisungtem aputsü asoshi jenjang agia liasü.

Meita aoba mapang telungpurtem asütsü ta bilemertem ya North Police Station kübok New Secretariat temeket nung pua liasü.

Police-i pua aliba telungpurtem ya, Senlo Khing (arishi küm 56), Self-Styled President, NNC/FGN (NA), Kitoho H. Zhimomi (arishi küm 38), Self-Styled Kilo Kilonser, NNC/FGN (NA) aser Tovito Kiba (arishi küm 29), Self-Styled Finance Kilonser, NNC/FGN (NA) ta jangjaogo.

Bushisüngdang mapang police temi .32 calibre country-made pistol ana den magazine ana aser injang 11, .22 calibre country-made pistol ka den magazine ka aser injang pongu aser Registration No. AS-26-3373 keta aliba Mahindra Scorpio gari ka puogo. Parnok ket nungi sena 48,500 aser

mobile phone pezü den tashishitsü aketba kuli kaketter ngutetogo.

Ozüng alema prangbong injangtem aser tashishitsü aketba kuli kaketter apuba dak sendakba nung North Police Station nung ken o ka benokogo. Maneni parnok nükijidong, tesendaktep aser ken o nung tangara sendaka ali mali aji jangjatsü atema bushisüngdang südar.

Temzüng ozüng shitak benoka inyaksangshitsü aser nürtem kümzüka toktsütsü atema Kohima police maneni bendanga agütsür lir. Lisopurtem dang temzüng ozüng benoka inyaksangshiba agency tem den teka amteper inyaksü aser ozüng alema maparen balala benoka inyaksangshiba indang osang lemsateptsü mepeshia metetdaktüogo.

Iba amala ozüng alema inyaksangshiba maparen kar danga metetra South Police Station den iba nümber; 7005986019 mesüra North Police Station den iba number; 7005986018 ajanga tongtepreteptsü metetdaktüogo. Osang agütsürtem amitsü miimbanga ayutsü, ta kasa sangdong ajanga metetdaktü.



Alongkima EAC HQ nung supervisors aser enumerators tem Census training agiba mapang EAC Alongkima Mhathung Nguillie, NCS-i o jembiba noksa nung angur. Training ya 2026 küm June 18 nungi 20 tashi agütsü.

PM Modi aser US Tir Trump nati onük aika nung o lemtep



June 18, 2026 nü France yimtiba, Paris nung India nungertemi Ato kilonser, Narendra Modi agizükdang tangokba noksa nung angur.

New Delhi, Aami/June 18 (Agencies): France kübok Evian nung G7 senden aliba mapang Ato kilonser Narendra Modi aser US Tir, Donald Trump na jurila senden ka amendang tenati linük ana tsüingda shishilembaba, defence tsütsü amalitep, region nung security aser energy tesendaktep atema jembio, ta ketdangsertemi metetdaksü.

Iba senden nungji US aser India na tsüingda shishilembaba dak sendakba tezüngzüktep agitsü aliba atema-a jembio.

Linük anati kodang iba tezüngzüktepji agitsü?, ta asüingdangba langzüdang Trump-i, "Iba tezüngzüktep ya kera agitsü," ta metetdaksü.

Lenir anati talisa Defence

tsütsü amalitepa inyaksü atema jembio, aser iba dak sendakba nung Trump-i, "Kari danga parnok (India) maakra onoki parnok yaritsü," ta metetdaksü.

Lenir anatisa West Asia tensa atema-a jembio.

Strait of Hormuz ya India nung energy supply atema kanga tongti lenmang ka lir, ajioda senden nungji iba atemajia jembio.

Ato kilonser Modi-i Trump dang, "Tzü lenmang lapoka ayutsüji kanga tongtibang. Alima rongsenkettzüng atema Strait of Hormuz lapoka ayutsüji kanga tongtibang, ta anapronglai bangjemer," ta ashi.

US-i rong ka amakdang tzüym nung senzür India nung asem asüba dak sendakba nung

Ato kilonseri, "Tzüym nung senzür India nungertem kümzüka alitsüji onok atema kanga tongtibang," ta ashi.

Iba dak sendakba nung Trump-i tawa tzüym nung senzür India nung asem asüba atema sasaba lemsat.

West Asia nung tensa tajungba akümtsü atema India-i shilem agitettsü asü? ta asüingdangba langzüdang Trump-i, "India-i aika nung shilem tulu agidar ta ni bilemer. Pa (Modi) lenir asüba mapang tashibo India-i shilem tulu agitettsü," ta ashi.

Yaküm Washington nung Modi aser Trump na ajurua senden amenba sülenbo tang mezüing tena France nung ajurua senden menogo.

Jharkhand Rajya Sabha election nung Parimal Nathwani-i takok angu

New Delhi, June 18 (Agencies): Brihostibarnü Jharkhand Rajya Sabha election nung National Democratic Alliance (NDA)-i pusemba candidate, Parimal Nathwani Ram-i menden ka nung takok angu aser tanungba menden ka nung ruling Jharkhand Mukti Morcha (JMM) candidate, Baidyanath Ram-i takok nguogo.

Iba election nung party tem tetuyuba anema vote agütsütepba ajanga Nathwani-i vote 28 ngua takok angu, aser Congress candidate, Pranav-i vote 20 dang angu.

Tanungba menden ka nungji JMM candidate, Ram-i vote 30 angu, aser BJP nungji vote ana

aser Congress nungji vote kaji tamagila liasü.

Osangbenertem den jembidang Congress Minister Deepika Pandey-i, "Ashioktsüogo" ta ashi.

BJP-i aniba NDA MLA 24 dang liasü, anungji takok angutsü atema menden pezü agi mabensai liasü saka 'cross voting' ajanga pai vote 28 ngua takok angu.

JMM aser Congress densema aliba INDIA teloktep nungji MLA 56 liasü aser Rajya Sabha menden anaprongla nungji takok angutsüsa menden shidak liasü ajisüaka cross voting ajanga parnoki menden ka nung tamakok angu.



June 18, 2026 nü New Delhi nung Shiv Sena (UBT) MP ana-Sanjay Raut aser Arvind Sawant nati osangbenertem den jembidang tangokba noksa nung angur.

Telegram nokdangba atema Court-i Centre dang tasüingdangba aka

New Delhi, Aami/June 18 (Agencies): NEET tatidang tanaben agishitsü anogo ishika dang lia India nung Telegram app nokdangba atema Brihostibarnü Delhi High Court-i Centre sorkar dang tasüingdangba kaogo.

High Court-i Centre dang, senso shilem ishikati exam agütsütsü aliba nung ajemdaker Telegram app amshir million 150 indang temeden agienba ya tim asü?, ta asüingdang.

June 22 tashi Centre sorkari Telegram nokdangba anema Telegram-i temepishiba ken o agütsütsü Justice Tejas Karia-i aniba vacation bench kati angadanga liasü.

National Testing Agency (NTA)-i ketdangsüa agiba tatidang ya June 21 nü agitsü aser sorkari Telegram app ya June 22 tashi nokdangtsü telemteba agi.

Vacation bench-i, "Sensotem shilem ishikati exam ka agütsütsü aliba nung ajemdaker kechiba nisung million 150 indang temeden nokdang?" ta asüingdang.

High court-isa Centre sorkar aser Telegram naprongla dang, item ama app menokdangi paper leak asüba aser osang tai prokba nokdangtsü atema kechi inyaksü akokar telangzüba agüjang, ta tetuyuba agütsü.

Centre tenung nung jembitsür Solicitor General Tushar Mehta-i, Telegram ya tim masüba nung amshittsüsa lir; iba app bot infrastructure ajanga iba app amshir ka kijai bots 40 yanglutettsü, aser ibaji ajanga osangtsüsang kanga prokshittettsü, ta ashi.

Paisa, tanga messaging apps nungbo item ama features ji mali, ta metetdaksü.

Ajisüaka Telegram-i, tashishitsü alibatem onoki agienadoker aser sorkar ketdangsertem den amalitepa inyaker, ta metetdaksü.

High Court-i taruba anogotem nung maneni iba ken o ya angadangtsü.

Rahul Gandhi-i 'Chhatron Ki Goonj' signature campaign tenzüktsüogo

New Delhi, June 18 (Agencies): Linük nung paper leak asüba aser fees tali meshiba densema shisaliok inyakyim majungba anema Brihostibarnü Congress lenir aser Lok Sabha nung Opposition lenir, Rahul Gandhi-i signature campaign ka tenzüktsüogo.

Rahul Gandhi-i, iba ya ajanga sorkar matsüingdang takhangba balala agütsütsü atema kaketshirtem nem sabang ka agütsütsü, ta metetdaksü.

Rahul Gandhi-i X ajanga iba campaign indang 'link' ka lemsat aser kaketshirtem dang nenok tebilemba lemsatpba den külemi petition nung sign süang, ta metetdaksü.

Paisa, "Iba movement nung dennang: Tsünglanglen agüja aliba link nung nemang. Nü tenung züluang aser nü tebilemba lemsatpang. Petition nungji sign süang," ta metetdaksü.

Anogo ka tejaklen Rahul Gandhi-i Rajasthan kübok Kota nung sentong ka nung jembia liasü.

Pai, India nung shisaliok inyakyim ya 'shimba inyakyim' ka masü saka 'magizükba inyakyim' ka lir; iba shisaliok inyakyim ajanga rongsen tsütsü khuret tulu bendenloktsür, aser ibaji ajanga kaketshirtem aser middle-class kibongtem kanga kongshir, ta metetdakja liasü.

Coaching Centres aika aliba Kota yimti nung ayongzükba sentong nung jembidang pai, tang aliba shisaliok inyakyim ya shisabulutsüsa lir aser inyakyim meshidak, ta ashi.

Kota nung ayongzükba 'Chhatron ki Goonj' senden nung pai kaketshirtem den paper leak asüba aser mapa manguba tebilemstü onüktem nung shisa lemsatpba liasü.

Kota nung aliba JEE candidate tetsür ka soseta asüba dak sendakba nung Gandhi-i, "Iba ya linük atema majung. Iba tetsürlai ajangshiba amaji linük nung kaketshir shingia majangshitsü atema asenok ajaki longjemer inyaksüla," ta ashi.



June 18, 2026 nü Tamil Nadu kübok Tiruchirappalli district nung Sri Lanka MP, Rauff Hakeem-i osangbenertem den jembidang tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, JUNE (AAMI) 19, 2026

Tanur asebo asotsüla

Tang ama linük nung asen ki tonga arua yimteni kilen aser nütsüng yongsük süktangba mapang ya asenok rongnung nütsüng arenba mesüra ajemba indang jembitsü mapang tajung ka bener arutsür. Aji oda, asen lima nung asenoki anepalu mesütettsüsa nütsüng onsara talila renlokra ajemdaktsütsü merangtsü aser ano nungdak mapatema meinyaktettsüsa nütsüng ajema kümra renlokdaaktsütsü indang bilema sentong yanglutsüba kanga tongtibang akümer. Alima nung asenok ajaki meranga inyaker aser rongsen bendener saka nütsüng melira itemjia menügdaker. Ibaji dang masü saka asenoki terenlok mapatem inyaksü indang jembir saka nütsüng melira mapa inyaksü nübo malitsü. Aji oda, yimten tsütsüa teimbai mulungba nung telemtetba agiba yimten yimsüsüba sülen anidak dang, nütsüng melira teti tamakok tsütsü adentsü. Itemji bilema asenoki nütsüng renlokdaaktsüba sentong nung temulung agütsütsü nungdaker. Ajisüaka, ano asenoki memesütettsüsa aser anepalu mesütettsüsa nütsüng aika renlokra, iba jagi tebilemstüang tali akümtsü. Iba tangatetba nung India nungbo nütsüng ajemtsü indang government-i dena kanga ajungshir. Iba sentong ajanga government-i nübortem dang kibong nung tanur aika soa nübener kibong mekümi kibong nung tanur ka mesüra ana dang asotsü asoshi sentong tapu balala ajanga teyaria dena agüja ajungshir. Iba ama nütsüng tali akümba tebilemstü akoktsü atema tangatetba agüja yimyim tapu balala agüja ayimba rongnung "Kibong tilaji Tepela kibong," "Small Family, Happy Family," ta ayimba yimyim asenoki angashia aruogo. Atangji, ibaji shitak lir, kechiyong kibong tilaji dang teka agi ayima anepalutettsü aser tanurtem nungdak agia peridaktsütettsü, anungji kibongji tepela nung alitsü. Iba yimyim tajungji angatetba agi asenok kibong aika nung tanur ka mesüra ana dak tali mesoi kibong tila kuma anepalua arur. Ajisüaka, iba jagi külenbo asenok nütsüng kanga ajema akümba agi mapa aika nung tangar memeneptsüsa kümogo. Aji oda, tanü asüng lanurtem kibong menur akümba agi tanur aika aginüaka mesoteter. Ibaji dang masü saka ano tzü mopong agi kibong aika nung tanur aginüaka mangur. Item ama kulitem jagi küm shia ,talisa, asen kinbo yimsüng shia nung nisung asoba dang nungibo asüba teimba ataloker. Aji oda, tasoba dang nungi tasüba teimba aser tanur masoba timtemtem dang masü saka tasortemia kibong shia tanur ana dak tali masoba agi asen kin nütsüng kanga ajema kümogo. Iba ama jenjang nung ano maneni ao nungbo küm noklang anasemka sülenbo asen kin ya alijak nungi samadoktsü aser tanü asen aliba ki ya dang masü saka asen yim aser asen town ya tangar bendanger meyong kümadoktsü. Atangji, kin ka nütsüng arentsüba nung mulungba kija agi ataloktsü makok saka Tsüngrem ket nung dang lir. Ajisüaka, asenok nem Tsüngremibo moatsür ser nung asenoki maginüi endokra aser nokdangra, ibajibo asenoksasa asenok akoksar asütsü. Aji oda, kibong nung tanur masoba tebilemstüji yutsür, tanur asortemia kibong nung tanur ka dang sora, ibaji nisung anati ka kuma yangluba mapa asütsü, anungji renloktsü melen, kibong tasen ka aküm shia par kin rongnung nütsüng ka ajemer asütsü. Ano, kibong nung tanur ana asobajia kecha balaka terenlokba mali, kechiyong ibajia nisung anati nisung ana yanglur asütsü, anungji tajema majemer aser terenloka merenloker. Ibaji kodang bilemdangdir, asenok ama kin tila saka alinükbo tulu nung alirtembo akok tashi nütsüng majemdaktsüi renloktsü asoshiang ajungshiteptsü kanga nungdaker. Atangji, alima nung talidaka maka aser aluyimtsü alia makaba pur jenti lir, anungji parnok atemajibo nütsüng renloktsü menügdaker, saka asenok ama Tsüngremi alinük tajung tulu maoja alirtem asoshiibo kibong shia tanur asebo asotsü tangatetba alitsüla. Iba jagiang nisung anati nisung ka talila yanglur asütsü aser nisung ka talila renlokba jagibo kibong nem aser alima nem timtem talilabo magütsütsü. Aji oda, asen kibong aser asen kin nung nütsüng talila ka renlok shia teyarir talila ka aruogo ta bilema asenokbo nütsüng renloktsüang merangtsüla aser nütsüng renlokba yari temerangba aser tajungba inyaksüa bilemstüla.

OLEMSABANG

NABONG TAREMTSÜ MAPANG NUNG RARATEPA TONGTEPER

~ L. Kika Pongener.

(Yashi adok nungi...)

Asenoki Naga nung tangar kintem koda putepa aser longjema alir (?) Ibaji reprangdangra....Naga nung tangar kintembo, pei kin tsüngda nungbo tzü-a meseni longjema aliba angur. Tenyimia kintem tzü-a meseni longjema aliba angur. Sema nung balaka Eastern Sema, Western Sema, Southern Sema, Northern Sema ta....Naga lima ajak nung prokshia liaka; tzü-a meseni longjema aliba angur. Tang Eastern Naga kintem tzü-a meseni longjema aliba asenoki parnok mapa agi ngudagi. Tesasatsüka, asen kidanger kin kabo mungdang nunga telemasa atoktsüsa tensa ka ajuruba ngua kanga sasa-a bilemstür. Mekümdangra, asen Aor-a iba tia jagi aitsü kecha meteta maka. Tanü asen Aor-bo mungdang aser arogo nunga putepa mali....Tanü asen Aor tia reprangdangra; kati ka küpok melitetba, ajemalua tila mekümtetba, tuluba shisatepbaTebou ka dak nungi jakzükba/razüka aoba semchir adianu sungsang dang balala sernung; otsü-olem balala zülutepa yur; kati ka aitsütepa tsükchitepa meputepba manener. Tanga ajakji oda yutsür, tamang yimsü agizükba nunga kenbang-obang mapu ken o kaateper....Kanga junga shisadangra; asen Aor tangar kintem dang kanga-sa taaktsüka lir. Tanü Aor tia reprangdangra...Kar nukjidong atalokogo ta pelateper, kar meputepi ken o kaateper aser karbo lokti nungi jentoker lir. Election aruba shia Aor-bo pei yimer o yimer na; adianu o adianu na tsüngda nunga nisung taküm dena mapayui tepsettsüsa tsükchitepa rarateper....Sen-a Aor-isa taginuba aser temeimba amai....Election aruba shia Naga lima kecha nunga matalokba tansutsü mapatem Ao lima nung ataloker...!!! Asen Aor tangar kintem dang kanga-sa taaktsüka lir.

Asen Aor iba jenjang nung ya-sa lira, tangar kin tesuleni talangka oadoktsü; aser ano putu ka ana-bo tangar sülen anidaktsü. Naga nung kin teimba ka dang; asen Aor-i Khristan yimsü sayua tenuk lapoktsü. Khristan yimsü nungji ajemalua tila akümtsüba; tenipong tabelen mahra tajichilena dendaktsüba; kati ka nem tatok agütsütsü; aser 'Kodak Senso' akümtsü sayur. Ajisuaka, tanübo tuluba shisangtepba, tashi raktepba, kati ka küpok melitetba, tuluba-tilaba ajaki tanishir (Leader) korang-semer dang sunur aser katia tanidaker mesunur. Aor-i Naga nung kin teimba ka nuji kümdaktsü; aser tanüa alima nung kin China, Myanmar, Nepal, Thailand, Cambodia, Arunachal, Karbi, Zeme kin etc. item kintem dang Yisu yimsü osangtajung sayur. Ajisuaka, asen atepzüng nung asen o asen na tsüngda nungpo tangatettep kati maruteti; ken o buluteper. Kanga-sa tesasatsü-ka, tanü asen Aor lokti nungi karbo jentokba aser jentoktsüba; iba amala otsü/osang angazükdang; aseni sayuba kintem kanga sungmanger....!!! Asenok opang mapu ken o bulutsüsa kong nungi tenzük (?) Iba tetenzükba teraji kanga junga bushidangtsüla aser meshizüng nung nukmen aia lira....Ibaji tamasa meruktettsüla.

Asenoki tejen putu indang otsü bushidangra....Naga nung tangar kinbo pei kin tsüngda nungpo leptepa raraba otsü mali; saka asen Aor-bo asen o asen na yim o yim na leptepa rara-a aruba kin lir; ibajagi tanüa asenok telongjem takang ka makateter sudi ta shisadanger. Asen Aor dak tashimait kaji....Asenok tuluba shisanga toktepba aser kati ka küpok melitetba ibala shisatsü ya melenshitsüla. Ano asen Aor dak tashimait tulutiba kaji....Asenoki tangar kin nembo aibelen tulu inyakba-a mela-mela tatok agütsür; oda tzüma-longmar nembo 'Khristan' tenung ademer mela-mela tatok agütsür....Saka asen Aor o Aor na tsüngda nungpo ken o tila-teri nunga lenji-i marutepi ken o tarokba-tarokba bushia tsükchiteper. Aji oda, asen lokti nung asen o asen na tsüngda obang-mapu ken o kar lira; akok tashi tanga sabang nung masü....Asen sasep nung lenji-i arutepa angatetteptsü lenmang bushitsüla. Aser iba ken o-ji kong nungi tenzük (?) Iba teraji kanga junga bushidangtsüla. Asen Aor kidong o kidong tsüngda nunga lipoklisang otsü-olem tali bushitepa ken o kaatepba iba ya anentsüla. Aor-ji Naga nung kin ajak nukrangtong lir....Naga nung tangar kintemi Aor-i kechi ashir (?) ta tenarong meronger angadar.... Anungji asen Aor-i tejakleni aoba kin ka ama....Naga nung kin ajak dang tatishitsü tajung inyaka sayutsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arunachal nung anti-conversion ozüing atema Khristantem den jembitsü



June 15, 2026 nü Arunachal Christian Forum (ACF) nung lenirtemi Arunachal Pradesh Chief Minister, Pema Khandu ajurua senden amenba sülen tangokba noksa nung angur.

June 18, 2026: Arunachal Pradesh nung Chief Minister Pema Khandu-i, state nung anti conversion ozüing yanglutsü atema Khristantem densema yimsü telok ajak den jembitsü, ta sangdongbaji Khristantem pelaa agizüker, ta Khristan lenirtemi metetdaksü.

June 15 nü Arunachal Christian Forum (ACF) nung lenirtemi Chief Minister aser sorkar ketdangsertem den senden amenba mapang nung Arunachal Pradesh Freedom of Religion Act (APFRA), 1978 ashishiba metetdakja liasü.

1978 küm iba ozüing agizükba sülen linük Tiria agizüka liasü, ajisüaka iba ozüing ya mapa küma mebenoki aruogo.

Anti conversion ozüing yanglutsü atema state sorkari committee ka tentetba sülen taküm March ita nung Khristan lenirtemi iba ozüing anema longkak ait tenzüka liasü.

June 8 nü iba committee jagi ozüingtem lateta sorkar nem agütsüogo.

June 16 nü osangbener den jembidang Arunachal Christian Forum chief adviser, Tara Miri-i, "Chief minister-i anti conversion ozüing mebenokdang tamasa lenirtem ajak den jembitsü, ta nangzükba atema Khristantem pelar," ta metetdaksü.

Guwahati High Court tetuyuba nung 2024 küm September ita nung Bharatiya Janata Party sorkari iba ozüing kübok temzüngtem yanglutsü atema maparen tenzüka liasü.

High Court dang tesüiba küm aika sorkar balalai Arunachal Pradesh Freedom of Religion Act (APFRA), 1978 ya sendoka yutsüogo, anungji iba Act kübok ozüingtem benoktsüla, ta temepishiba ka agüja liasü.

Miri-i, iba ozüing yangluba mapang nungi tenzüka Khristantem iba ozüing anema nokdaker, kechiyong iba ozüing ya ajanga yimsü temeden nokdang, ta ashi.

Committee-i sorkar nem report agütsüba sülen state

yimtiba, Itanagar densema district 29 nung Khristantem longkak aita liasü.

Miri-i, "State nung Khristan denominations 46 lir aser züingsemti pepei tesem nung longkak aitogo, sarasadem ayongzükba agiogo aser lumiba sentongtem ayongzükba agiogo," ta metetdaksü.

Arunachal Christian Forum-isa taküm March ita nung state assembly senden tagidak mapang nung longkak aita liasü.

Forum Tir, James Techu Tara-i, anti conversion ozüing atema ajak den jembitsü, ta chief minister-i tezüluba nung agütsüogo, anungji June 18 nü longkak aittsü aliba sentong onoki thinenogo, ta metetdaksü.

Paisa, ajisüaka sorkari nangzükba amaji meinyakra onoki maneni iba ozüing anema longkak aittsü, ta metetdaksü.

Chief Minister Khandu-i social media ajanga, "Ozü sorkari yimjung, tesünep aser terenlok atema inyaksü. Tepor tajung state ka nung yimsü balala amanger shinga mulung

meyrutsütsü mesüra mesendoktsü," ta metetdaksü.

Arunachal Pradesh nung lisopur yimsü wazüka ayutsü nükjidong nung Arunachal Pradesh Freedom of Religion Act (APFRA), 1978 ya agizüka liasü, ajisüaka iba ozüing anema ajanga sorkar balalai iba ozüing ya mapa küma mebenok.

Iba ozüing kübok tashiyim amshia, mesüzüka mesüra ashikülak ajanga yimsü meyipdaksütsü memelar. Iba ozüing kübok aibelenertem küm ana tashi tepuokdak ayutsü mesüra senchi 10,000 tashi achitsü akok.

Iba ozüing kübok yimsü melenertem district deputy commissioner nem jelia osang metetdaksütsüla, iba denji külemi temerenshi-a lir.

Nütsüng million 1.38 aliba Arunachal state nung nütsüng shilem 30.26 Khristantem lir, nütsüng shilem 29.04 Hindu nungertem, lisopur yimsü amanger shilem 26.20, Buddhist nütsüng shilem 11.77 aser Muslim nung nütsüng shilem 1.95 lir.

Bengal nung Khristan lenirtemi yimsü temeden wazüka ayutsü mepishir

June 18, 2026: Northeast nung aliba Khristan denomination aikati akümba tentet kati, West Bengal nung Chief Minister tasenba pelaa agizüker, ta metetdaksüba den külemi state sorkari yimsü temeden wazüka ayutsüla aser Khristantem nem tekümzükba agütsütsüla, ta takhangba agütsüogo.

Khristan denomination balalai akümba Bangiya Christiya Pariseba (BCP)-i, state nung lenir tasenbai Khristantem sadoksadoka pei yimsü benshitsü atema inyaksü aser linük temzüng kübok Arrla 25 nung aliba ama yimsü temeden agütsütsü imlar, ta metetdaksü.

BCP-i sangdong ka ajanga, sorkar tasenba kübok Khristantem sadoksadoka litettsü imlar, ta ashiba den külemi northeast tesem aika nung Khristantem anema

inyakba tebilemstsü lemsatep. BCP-isa, "Khristantem atema baptiba ya kanga temeshi, aser Yisu Khrista sülen anidaksü atema pei sasa melungtetertem dang baptitsütsüla," ta metetdaksü.

Khristan ministry temi züngsem renloksü nükjidong nung meinyaksüla, ajisüaka chichia Khrista agizükdaksütsü atema rangloker inyaksüla, ta parnoki metetdaksü.

BCP-i, "Khristantem anema jembiba aser osang tai prokba kanga bulua akümer, aser ibaji ajanga Khristantem tsübur mesüra Khristantem dak melung malemstsüa akümer," ta ashi.

BCP State Committee-i report ka ajanga, "Khristantem sendokdaksütsü nükjidong nung Khristantem anema jembir aser asalentong yanglua inyaker. Online nung

ANOGO ABEN TSÜNGREM DEN

Taochi talubusa aser angati

"Saka Pai taochi tuluba agütsür. Anungji Laishibai ashir, Tsüngremi asükümer noktanger, saka ajemalur nem taochi agütsür." Yakob 4:6.

Asen nungdak nung yaritsü Tsüngrem taochi talubusa lir ta Laishibai ashir. Yohani ashir, Pa teperiba nungi asenoki taochi madak taochi angur. Ni aginüba dang tali Tsüngremi kü nem taochi agütsür. Asenok sasa külakokdakja Pai agütsüba sempettemji asenok amshitsü akok ta aseni bilemstsü akok, asenoki makoktsü. Iba dang nungi asüng nungdak asoshi asüng Pa taochi ayong ama ayimstsü ta angateta tanü nungdak asenok tanü peria agütsüla. Kong nungi, koma ayimstsü masüngdangi asenok anogo shia marok ondaksütsüla. Tsüngrem o ajanga Tanela Temeshi-i anogo shia meshitettsüba nung anünga mali.

Ni imlaba dang tali Pai taochi agütsür. Sen agi dang asen nungdak tera anguba lokti nung asenok alir, aser ibaji Tsüngremer talubusa taochi den medemdangtsü makok. Aikati Tsüngremi tekümtet agütsür saka takum chiyungtsü magütsür ta bilemer. Aji saka tekümtet ayongi dang meshitettsüba aser tenzükba ayimer. Nai aginüba tashi tatetang, Pai taochi tali agütsütsü. "Ni asüngdangba dang tali Pai taochi tali agütsür. Aikati parnoki Tsüngrem nem timtem agüja taochiji asüngdang ama bilemer. Kibubai langzutsü südi, "Ne sasa ne marokji sünga inokang! Ni ne nem taochi agütsüogo." Pa taochi ayong ajak nungdak tashi lir, anogo shia, tatitangba shia, tejashi shia, tebilemstsü, tepela aser tenzükba ajak nung. Asükemeri dang Pa taochi ayong sendoker. Ajemaluri yangji pungoka aremer.

telok kari Khristantem ya India nung sobaliba anemertem mesüra bendangertem den sendaktepa lir ta tai tongloksür," ta metetdaksü.

Committee jagisa, kibong tekülem sentong agiba mesüra Khristantem adenshia sentong agiba ya kari miima noksa tangokba sülen social media nung prokshir aser item sentongji kangshia yimsü meyipdaksüba ama tiyazü osang proker, ta metetdaksü.

"Item ama osang tai prokba nung ajemdaker Arogotem aser tamangertem anema inyaker. Sarasadem sentong tagidak mapang nung timtem agütsür aser ozüing alema Khristantem tangartem yimsü meyipdaksür ta tai tongloksür. Aiben pastor tem aser Arogo nung züngsemtem jaoka asüngdangyar mesüra pua ayur," ta report nung shia lir.

BCP-i, Arogo kiojen raksatsüba aser Khristantem leper raksatsüba tatalokba aika lir, aser tangbo tamanger karibo pei yimsü maitsü-a mimshitsüa akümer, ta metetdaksü.

BCP-i, All India Christian Council aser United Christian Forum ama national Khristan teloktem ajanga tangbo India tesem ajaklen Khristantem temeden wazüka ayutsü aser Khristantem kümzüktsü atema ola tesashiba adoker, ta metetdaksü.

BCP-i, tang Chief Minister tasenba kübok sorkari Khristantem tebilemstsü onük balala atema inyaksü ta Khristantem imlar, ta metetdaksü.

Parnokisa Chief Minister dang senso ajaki kecha tarendak makai pei yimsü benshitettsü atema yimjung atema inyakang aser ochi temeden agüjang, ta mepishi.

AO OSHI ANGAZÜKDAK:

TANÜ ANGAZÜKTSÜBA OJANG



Yimsa

(v) Tzü ama küma aoba (melt)

*Tzünglu arua rür tsükba sülen ajak yimsaa ao.

Yimsen

(n) yim tasen (new village)

* Onok ya yimjen toktsür yimsen nung alirtem lir.

OLONG PAITEP # 7539

| | | | | | | | | |
|----|--|----|---|----|---|----|--|----|
| 1 | | 2 | | 3 | | 4 | | 5 |
| | | | | | | | | |
| | | | 6 | | 7 | | | |
| 8 | | | | | | | | |
| | | | | | 9 | | | |
| | | 10 | | | | | | |
| 11 | | | | | | | | 12 |
| | | | | 13 | | 14 | | |
| 15 | | | | | | | | |
| | | | | | | | | |
| 16 | | | | | | 17 | | |

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 7538 TELANGZÜBA

TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER



Manpreet Singh-i Indian hockey puti otsü nung alizüng tasen ka tongteta pa ya linük tenüng nungi asaya timba nung asayaba asayar kümogo. Bodhbarnü Germany den asayaba ya Manpreet asoshi linük tenüng nungi asaya 413 nung asayaba liasü. Pai Hockey India president Dilip Tirkey ajatetogo, shiba asaya 412 nung asayaba sülen asaya nungi anisüngzüka liasü.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Manipur nung telungpur 5 den prangbong injang apu

Imphal, Aami/June 18
(Agencies): Central aser state security force tem team kati taoba anogo ana tsüngda Manipur kübok lenden nung aliba district tem nung tesem balala meita aoba mapang telungpur telok balala den sendaka alitsü ta temulung melemi bilemer nisung pongu den prangbong injang puogo, ta ketdangsürtemi Brehostibarnü metetdaksü.

Mezüngbuba meita aoba sentong nung security personnel temi tenokdangba agütsür aliba People's Liberation Army (PLA) indang

political wing Revolutionary People's Front (RPF) indang züngsem ana Imphal West district kübok tesem balala nungi apu.

Pua aliba telungpur ana ya Mutum Mohen Singh (29) aser Sanayaima Leichombam (50) ta jangjaogo.

Tanga meita aoba sentong ka nung security force temi Socialist Revolutionary Party (SOREPA) züngsem Loukrakpam Ibungo Meitei (42), Imphal East district nung Porompat Police Station kübok Kongpal Iranpham Thongkhong nung apu.

Security personnel temisa, Kangleipak Communist Party (KCP) züngsem Heikrujam Hitler Meitei (18) Imphal East district kübok Kongba Laishram Leikai tesem nung puogo.

Maneni sepaitemi Yumnam Seityajit Mangang (36) puogo, shiba Imphal valley nung inyaksangshiba telungpur telok ka züngsem lir. Pa ket nungi .22 calibre revolver la aser injang teku ngutetogo.

Sepaitemi pua aliba telungpurtem ya ken o dak sendaka aliba ketdangsürtem nem bendanga agütsüogo aser bushisüngdang maneni südar.

Assam: CM Sarma Deputy Speaker atema Dr Habbey nominate asü

Guwahati, Aami/June 18
(Agencies): Assam Chief Minister Himanta Biswa Sarma-i Brehostibarnü Amri (ST) Hills constituency nungi MLA Dr Habbey Teron, Assam Legislative Assembly nung Deputy Speaker mapa atema sorkar candidate ama nominate süogo.

CM-i iba osang ya social media sabang X ajanga metetdakja liasü. CM Sarma-i ashiba agi, state yimden yimsüsüba nung tesem ajak nungi aser talisa tribal lokti nungi lenirtem nem tenzükdaksütsü

asoshi sorkar rangloker aliba dak ajemdaker iba telemtetba agiogo.

Sarma-isa, Dr Teron shiba medical practitioner ka lir, pa ya tawa tentetba Amri constituency nungi shimba mezüngbuba legislator lir, ta ashi. Dr Teron iba mapa atema shimba ajanga Assembly nung Karbi Anglong aser Dima Hasao nungi lenirtemi yimden yimsüsüba nung shilem agiba tashi itshidaksütsü, ta CM Sarma-i ashi.

Maneni Chief Minister-i

ashiba agi, iba constitutional mapa atema Dr Teron nominate asüba asoshi kanga pelar aser iba jenjang agiba ajanga legislative inyakyim nung lisopur lokti tentettem ola tali tajungba angashitsü ta temulung lema bilemer.

Paisa, Dr Teron-i pa nem nongloktsüba mapa tasen ya takok ngua inyakyonga aotsü imlaja ataba lemsatepba den, pa nominate asüba ajanga pa dak temulung alemba aser nüburtem tejangraba ataloktsüba sayur, ta shisem.






First Phase of Census 2027 NAGALAND

SE (SELF ENUMERATION)
16th June - 30th June, 2026

HLO (HOUSE LISTING OPERATIONS)
1st July - 30th July, 2026

Let us fulfill our responsibility
Let us participate in the census

Our Census - Our Development
visit today: se.census.gov.in




CensusIndia2027

FIFA WC: Portugal & Congo na draw asü; England & Colombia nati takok angu



Aami/June 18, 2026

(Agencies): Bodhbarnü tanga asaya aliba FIFA World Cup Group K asaya ka nung Portugal aser Democratic Republic of Congo na goal 1-1 agütsür asaya tembanga liasü.

Asaya tenzüker mapang tatsüka tsingda Joao Neves-i Portugal atema goal ka idaktsü, saka asaya mezüngbuba shilem matem tsingda Yoane Wissa-ia Congo atema goal ka idakja liasü. Congo team ya 1974 küm sülen tang mezüngbuba World Cup nung asaydar.

DRC-i team tajung ka den draw süa asayatetba ya parnok asoshi takok tulu ka lir, kechiyong linük nung Ebola tashidak poktetba ajanga parnok iba asayamung atema renemshiba mapang

tetsükdaktsü adoka liasü.

Portugal team-i asaya kanga junga tenzüker aser minute trokbuba nung Pedro Neto-i ball agütsüba Neves-i kanga junga tongokja parnok tejakdang aküm.

Iba sülen Portugal puri asaya amokbanger asaya saka goal magütsüteni asaya aliba mapang ka nung Wissa-i Congo atema goal ka idakja kasasa aküm. Asaya tanabuba shilem nung team anapronglai goal idaktsütsü maangka angu saka magütsüteni asaya tembang.

Bodhbarnü tanga asaya ka nung Harry Kane-i asaya mezüngbuba shilem nung England atema goal ana idaktsüba sülen parnok Croatia goal 4-2 agi kokogo.

Asaya nung Kane-i goal ana idaktsüba ajanga England team

tejakdang toktsü, saka Croatia nungi asayar Martin Baturina aser Petar Musa nati goal kaka idakja goal kasasa aküm.

Ajisüaka asaya tanabuba shilem tenzükeri Jude Bellingham-i England atema tasembuba goal aser asaya atemtsü minute pongushi anunga lia Marcus Rashford-i goal pezübuba idakja parnok asaya akok.

Thomas Tuchel-i aniba team ya 1966 sülen tang mezüngbuba World Cup ka akoktsü atema meranga asayadar aser parnok asayamung kanga junga tenzükeri.

Maneni Group K nung Colombia aser Uzbekistan na asaya Colombia-i goal 3-1 agi kokogo. Iba asaya nung Luis Díaz-i goal ka idaktsüba den ka assist süja liasü.

Asaya nung mezüngbuba goal ya Daniel Muñoz-i Colombia atema minute 40buba nung idaktsü. Iba sülen Bayern Munich winger yagi minute 65buba nung tanabuba goal idakja Colombia goal 2-0 agi tejakdang aküm.

Uzbekistan, shirnok tang mezüngbuba World Cup nung asayar, parnok minute 60buba nung Fayzullaev Abbosbek ajanga goal ka idaktsü.

Ajisüaka asaya tanabuba shilem nung mapang apuloktsür asayaba mapang Jaminton Campaz-i Colombia atema goal tasembuba idakja parnok asaya kokogo.

Rohit Sharma-i alizüng tasen ka tongtetogo



Aami/June 18, 2026

(Agencies): Bodhbarnü Afghanistan den tanabuba ODI asayaba mapang Rohit Sharma-i List A cricket nung run 14,000 yanglua alizüng tasen ka tongtetogo. Pa ya iba alizüng tongtetba India nung batter pongububa kümogo.

Taoba mapang India captain yagi iba asaya nung ball 39 nung run 48 yangluba sülen iba alizüng tongtetogo. Iba asaya nung pai four trok aser six ana azük aser pa indang strike rate 123 liasü. Pa Rashid Khan-i out süja liasü.

Iba asaya nung run 48 yangluba sülen Rohit-i List A asaya 356 nung run 14,038 yangluogo. Paisa, iba format nung century 37 yanglur lir, kong international, domestic aser state

jenjang nung ODI asayabatem densema lir.

India nung batter tem rongnung asayar pezüi dang Rohit dang nungi List A run timba yanglur lir. Asayartem rongnung Sachin Tendulkar temaba jenjang nung lir. Pai asaya 551 nung run 21,999 yanglur lir, kong century 60 densema lir. Pa sülen Virat Kohli (16,447 runs), Sourav Ganguly (15,622 runs) aser Rahul Dravid (15,271 runs) nung lir.

Asaya nung Afghanistan-i toss akok aser mezüng bowling asütsü shima liasü.

Mezüngbuba batting amenba sülen India nung asayartemi asayar ajak out ser run 402 yanglu. Asaya nung captain

Shubman Gill aser Ishan Kishan nati century kaka yanglua tena senteper run 224 yanglua liasü.

Taruba küm World Cup atema renemshiba nung shilem ka ama Rohit Sharma den Yashasvi Jaiswal-i asaya tenzüker aser Gill No.3 nung asaya liasü. Ajisüaka Jaiswal ya tanabuba over nung run 4 dang yanglur out süatok.

Rohit kanga ayonga ayonga asaya liasü aser pai run aika yanglutsü ta bilema aliba mapang Rashid Khan-i googly ka aonba pa indang bat nung tsükdaker stump nung ona out süatok.

Iba sülen Gill-i asaya amokbanger asaya aser run 154 yanglua liasü. Iba asaya nung century ka yangluba ya Gill atema century tekububa aser India ODI captain akümba sülen mezüngbuba century liasü.

Kishan-ia team nem teyari tulu agüja run 125 yanglu, koba pa asoshi ODI asaya nung century tanabuba liasü.

Lucknow nung iba asaya ya India-i run 170 agi koka parnok asaya ka asayatsü anunga lia asayamung kokatokogo.

Konate küm 4 atema Madrid den tenangzüktepba yanglutsü

Aami/June 18, 2026

(Agencies): Real Madrid-i Ibrahim Konate den küm pezü atema tenangzüktepba ka yanglutsü mulunga agizükogo. France nung centre-back yagi Liverpool toktsüba sülen iba tenangzüktepba yanglutsü.

Arishi küm 27 tain asayar ya June ita tembangba sülen free transfer ka ama Liverpool toktsütsü. Jenjang aser taah dak sendakba nung Konate aser club na tangatetep ka dangi marutetba sülen tenangzüktepba tasen meyanglutet.

Real Madrid-i ashiba agi, taruba season pezü tashi Real Madrid nungi asayatsü atema club aser Konate na tangatetep ka dangi aruogo. Pa Real nungi 2030 küm June 30 nü tashi asayatsü.

Konate, shiba 2026 World Cup nung par linük indang squad nung züngoksema lir, pa 2021 küm RB Leipzig nungi oa Liverpool nung aden. Pa pound million 35 agi alizük aser küm pongu atema tenangzüktepba yanglua liasü.

Pa Liverpool nungi tetoktepba

ajak nung asaya 183 nung asayaogo aser iba mapang Premier League, FA Cup aser League Cup ana kokogo.

Konate-i, May 24 nü Liverpool pur Brentford den tatembangbuba Premier League asaya asayaba mapang Liverpool fan tem dang tatem o ashitsü atema maangka mongutetba atema mepeli bilemeba lemsatepogo.

Paisa, "iba mapang ni club nungi tatembangbuba asayar asütsü ta memeteti liasü," ta ashi.

Real Madrid puri Jose Mourinho tanabenbuba parnok indang manager asütsü shimba sülen Konate tang iba club nung denogo.

Bernardo Silva aser Marc Cucurella-a tawa Real nung denogo.

Arishi küm 31 tain Portugal nung midfielder Silva-a Real Madrid atema free transfer ka liasü. Pai Manchester City toktsüba sülen tang Real nung denogo. Kasa mapang nung Spain nung defender Cucurella, Chelsea nungi pound million 52 agi alizükogo.

Ivory Coast forward Wahi nem Canada-i aitsü atema Visa magütsü

Aami/June 18, 2026

(Agencies): Forward Elye Wahi nem Canada-i aitsü atema visa magütsüba sülen pa Ivory Coast pur Germany den asayatsü aliba asaya nung masayatetsü, ta Ivorian federation-i Brehostibarnü ashi.

"Pa Canada-i aitsü atema temelaba tang tashi monguteti lir," ta Ivorian federation (FIF)-i ashiba den, pa Honibarnü Toronto nung asaya atema team den külemi Canada-i motettsü, ta shisem.

FIFA World Cup 2026 nung Canada-i aitsü atema visa magütsüba asayartem rongnung Wahi ya tanabuba lir. Ghana nung asayar Thomas Partey nema visa magütsü.

Hombarnü Philadelphia nung Ecuador goal 1-0 agi akokba asaya nung Wahi ya Ivory Coast team nung tetenzük nungi asaya liasü. Team meyipa maru tashi pa United States nung dang mungzüka atatsü, ta federation-i ashi.

French soccer league-i Bodhbarnü ashiba agi, May ita Ligue 1 nung Nice den asayaba mapang Wahi yellow card ka achitsü ta shia alima ajunga nung bet aika süa liasü.

League-i, May 17 nü Nice pur kidang Metz den asayaba dak sendakba nung international jenjang nung temulung malemetsüsa inyakyim kar benoka inyakba indang betting market asadanga aliba partner tem nem osang agüja liasü. Iba asaya ya

draw nung tembang aser Wahi yellow card ka chia liasü.

French league-i ashiba agi, parnok police aser gambling authorities aser French Football Federation nem osang agütsüogo.

Police-i Wahi dang ken o ashishi mashishi ta asüngdangba mapang Marseille prosecutor indang office-i Associated Press dang ashiba agi, "arishi küm 23 tain professional football asayar, shiba France indang Ligue 1 championship nung asayar, pa bushisüngdang nung shilem ka ama 2026 küm May 29 nü puogo."

Ken o dak sendakba nung Wahi indang representatives-i osang kecha magütsü.

Ivory Coast Football Federation (FIF)-i ashiba agi, Whai dak sendakba nung judicial mesüra administrative jenjang agiba indang parnok nem officially memetetdaksü.

May 17 ya Ligue 1 season tatembangbuba round liasü. Iba sülen hopta ana dang lir Wahi-i Nice pur Ligue 1 nung maneni asayatsü atema teyari agütsü. Promotion-relegation playoff tanabuba leg nung Saint-Etienne den asaya goal 4-1 agi akokba nung pai goal ana idakja liasü.

Arishi küm 23 tain Wahi ya German club Eintracht Frankfurt nungi January ita Nice nung oa aden aser pai asaya 18 nung goal 9 idaktsü aser Nice pur French Cup final tonga asayaba nung teyari agüja liasü.

BILEMDANGANG

"Khen merangdang mekokra maneni merangdangang."